

Tuntutan Dr M: Najib tidak perlu ke mahkamah
Free Malaysia Today
Julai 27, 2016

Hakim berkata pada peringkat ini, bukan tugas mahkamah untuk putus sama ada wujud percanggahan dalam affidavit perdana menteri atau tidak.

KUALA LUMPUR: Mahkamah Tinggi hari ini memutuskan Perdana Menteri Datuk Seri Najib Razak tidak perlu memberi keterangan berhubung kandungan affidavitnya yang didakwa mempunyai "percanggahan".

Peguam Hafarizam Harun yang mewakili perdana menteri berkata Hakim Abu Bakar Jais memutuskan bekas perdana menteri Tun Dr Mahathir Mohamad, ahli Umno yang dipecat Anina Saadudin dan bekas naib ketua Umno bahagian Batu Kawan, Datuk Seri Khairuddin Abu Hassan gagal menunjukkan keperluan untuk memanggil Najib memberi keterangan terhadap affidavitnya.

Ketiga-tiga individu itu menyaman Najib atas dakwaan salah guna kuasa.

Pada 10 Mei, mereka memfailkan permohonan untuk memeriksa balas Najib di mahkamah berhubung affidavitnya.

Mereka mendakwa ia bercanggah, tidak konsisten dan kurang jelas dalam kandungannya. Affidavit itu bagi menyokong permohonan membatalkan tuntutan saman Dr Mahathir dan dua yang lain.

"Dalam perkataan mudah, perdana menteri tidak perlu datang ke mahkamah," kata Hafarizam.

Peguam itu berkata mahkamah menetapkan 4 Ogos untuk pengurusan kes.

Peguam Haniff Khatri Abdulla yang mewakili Dr Mahathir mengesahkan kenyataan Hafarizam.

"Hakim berkata, pada peringkat ini bukan tugas mahkamah untuk memutuskannya, sama ada wujud percanggahan dalam affidavit Najib, atau tidak," kata Haniff mengulas lanjut kenyataan Hafarizam.

"Ia terbuka untuk diputuskan pada peringkat membatalkan kes."

Dr Mahathir, Anina dan Khairuddin mendesak supaya Najib diarahkan membayar kerajaan sebanyak RM2.6 bilion dan RM42 juta.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/07/27/tuntutan-dr-m-najib-tidak-perlu-ke-mahkamah/>